

111 學年度桃園市立光明國民中學
七年級國語演講題目

1. 我最拿手的一件事
2. 我從閱讀身上學到的事
3. 如何善用 3C 產品



111 學年度桃園市立光明國民中學

八年級國語演講題目

1. 網路與我
2. 我的快樂方程式
3. 一個意外的發現
4. 從一則新聞談起
5. ○○，請聽我說



01 恐怖的雞籠蜂

許嘉勇

彼日透早，天時誠好，阮規家伙做陣去到內山斗底的一間渡假村。因為六月天火燒埔，下晡時阮就攏守佇室內的游泳池耍水。耍規下晡久，到甲五點外，阿母就喊阮逐家緊起來洗身軀，因為準備欲來去食暗頓囉！

阿爸先共猶咧讀幼稚園的小妹洗，我褪裼裼倚跔邊頭¹聽候。雄雄，我大腿後肚感覺撚撚，伸手去抓，寢頭仔摸著的時，想講是狗蟻爬起來我的身軀頂，越過頭斟酌一下看，哎喲喂！竟然是一隻蜂停佇我的大腿咧行動，我掣一逃，喝一聲「啊！」誠大聲，隨共伊掰開，阿爸聽著我的聲說就喝講：「按怎？」我對喙應講：「我去予蜂叮著囉！」

彼隻蜂佇我的面頭前飛過來閣飛過去，我嘛閃過來這爿閣閃過去彼頭，阿爸蓮苞頭²擰咧，用水一直共伊濺，隨閣用蓮苞頭共伊揷甲死翹翹。斯當時，拍算是蜂毒開始起磅囉，我的大腿煞開始疼甲擋袂牢，害我一直喝：「足疼的、足疼的。」哀甲大細聲。阿爸緊用浴巾共我慢咧，抱出來外口坐，規游泳池的人客嘛攏驚甲四散去，走甲無地看。

後來，飯店的工作人員先共我抹寡 â-móo-ní-à，毋過我猶原是疼甲一直吼，經理緊駛車載我侖阿爸去病院掛急診。路裡，阮母仔共彼隻蜂的相片傳予阮阿爸。伊上網一

下查，講應該是「烏腹虎頭蜂」。

去到病院了後，阿爸點相片予醫師看，醫師一下看隨講：「烏腹虎頭蜂！」一必一中，對對去予阿爸臆著。先生先提冰角予我焐咧，才閣共我抹消炎止疼的藥仔，講若無過敏的反應就較無要緊，毋過抗過敏的藥仔一定愛食，驚過敏反應的症頭會閣夯起來。

阿爸後來共我講，這號蜂岫若雞籠的「雞籠蜂」，聽講是咱臺灣上危險的虎頭蜂，新聞不時都咧報講有人去予雞籠蜂叮著，煞做仙去的都有！

好得佳哉，轉來了後我攏好勢好勢，無任何的症頭。這遍真正是佛祖有保庇，萬不二若引起過敏性的休克，去予閻羅王招去做困婿，彼就袂直囉！

¹邊頭(pinn--thâu)

²蓮苞(pôo)頭



02 阿公的菜栽仔場

王善

「阿孫，緊去攢紙箱仔予頭家貯！」這是我自細漢定定聽著阿媽共我講的話。

阿公倂阿媽佇大園仔經營菜栽仔場，個的菜栽品質是桃園上好的，毋但厝邊頭尾的作穡人會來買，甚至上遠閭有對金山、高雄來的人來遮割貨。莫看阿公按呢誠勢種菜，其實伊少年的時毋是作田的，較早伊是一個裝潢木工師傅，後來才改去種稻仔，閭捌著過拔秧仔比賽的第一名呢！尾仔伊佇厝隔壁開一間栽仔場，閭家已發明一套自動沃水的機器。經過幾若年的用心拍拚，菜栽仔場才沓沓仔變甲「頂港有名聲，下港上出名」。

自細漢，若拄著歇熱，我攏會轉去阿公的栽仔場門賣菜栽。逐年賣的菜栽攏無全款，熱天的時陣有小玉仔西瓜、烏美人西瓜，閭有幾若種菜瓜、冬瓜倂苦瓜；秋天是賣高麗菜、萬仔菜、芥藍仔倂青花。阿媽會炃我去田裡，一項一項講予我知。予阿媽「上課」了後，繼落來我就會變做上精光的推銷員，逐工天拍陪仔光就精神，準備共濟濟的人客門貯菜栽。我會記得有一位臺北來的阿伯，逐擺攏講我又閭大漢矣，閭講我愈來愈緣投。雖然毋知影伊到底是講誠實的抑是咧褒嗦爾爾，細漢的時若看著伊，攏感覺伊

談諧閭親切，嘛足興倂伊開講。

除了賣菜栽以外，佇歇睏的時陣，我嘛誠愛佇栽仔場附近騎跤踏車，閭佇闊莽莽的草仔埔走來走去。阿公的菜栽仔場就佇桃園機場邊仔，所以我這個走跳固定定佇咧草仔埔逐飛行機，希望有一工會當像飛行機全款，飛到足懸足遠的所在，共這個世界看予透。除了這以外，嘛有一寡難忘的恐怖記持。有一擺我騎跤踏車去附近的土地公廟踅踅咧，煞拄著野狗共我逐，我只好從去廟隔壁的姨媽個兜喝救命。後來是姨媽用柴枋仔共彼隻狗仔嚇驚予走去，我才會當安全轉到菜栽仔場。

毋過，菜栽仔場的彼塊地咧欲予政府徵收去起機場矣。時間一工一工過，曆日的紙一張一張拆，希望佇曆日拆了彼時，菜栽仔場會當繼續留佇阮心內。



03 多謝恁

韓滿¹

有人感謝天感謝地、感謝老母倂老爸；有人感謝老師的牽教、感謝同學的陪伴。啊若我咧？

國小六年的時，老師叫阮每一个人做一本家己的畢業紀念冊，愛共國校的生活寫落來閤畫落來，逐家聽甲霧嘎嘎。往過紀念冊攏嘛予翕相館做的，逐家倂同學翕幾張仔相片就好，今年是按怎愛家己做？老師講：「今年逐個人攏愛加做一本獨一無二的紀念冊。」

門陣六冬，死忠兼換帖的好朋友攏欲分開矣，阮想著過去的種種，就緊共寫落來，寫了閤再改、畫了閤再拊。會記得有一冬我出車禍躊院，老師掂蘋果來病院看我，伊共我惜惜閤講：「你愛堅強、愛保重，逐家攏咧等你喔！」

有一擺老師去開會，教室予人關甲暗眠摸，老師轉來的時，雄雄門開開、電火光矣，足大聲的生日快樂歌倂嘆仔聲害老師掣一趙，繼落來逐家共老師攬牢牢，予老師生日彼工歡喜甲目屎四淋垂。

這幾冬來，全班嘛有真婧的記持，值得一世人留念。阮做伙演戲、做伙答喙鼓，參加籃球、跤球倂野球的比賽。老師定定講成功毋通驕傲、失敗袂使餒志。阮閤分工，做伙寫作、畫圖、錄音，全班共同完成一本足心適的尪仔冊。

老師呵咾甲，講逐家攏是作家，畢業的時，每一个人攏會當提逐家做伙做的尪仔冊，俗家己創作獨一無二的紀念冊轉去。

想著咧欲畢業，逐家毋甘分開，學牛郎、織女共七月初七定做同窗會的日子。看著校園的鳳凰花，我佇紀念冊畫一幅圖閤寫一首詩！花瓣飛甲滿四界，蟬仔叫甲頭犁犁。約束七夕同窗會，想著袂睏到五更。」彼暗，我真正目睞金金到天光喔。

老師講：「毋管冊讀了好抑穠，毋管錢趁了濟抑少，荏苒馬嘛有一步踢，一枝草一點露、天無絕人之路。後擺逐家全款愛做一个好品行的人，只要揣出家己的興趣，好好仔學幾項仔工夫，認真拍拚、一步一跤印，行行攏嘛會出狀元。」

感謝父母共阮晨，感謝老師倂同學的陪伴，予阮脫離病疼，行過國小的歡喜倂鹹酸苦澀。多謝恁！

¹韓滿(Buán)



04 一擺上有意義的活動

柯淑慧

「恁捌聽過募集發票無？」同學猶捎無摠，老師就繼落去講，欲利用學期尾上課的時間做公益活動的想法。

柱開始，老師放一段影片予全班看，我看著一寡仔目睭柴柴倒佇眠床頂袂振袂動的人。老師講這號做「植物人」，因為厝裡無法度照顧個，姑不而將才送來遮。老師講：「創世基金會是義務照顧植物人的單位，因為照顧病人的開銷真大，基金會定定欠所費，咱來想看會使按怎共門相共？」

同學嗤舞嗤呲開始參詳，有人講欲捐錢、有人講欲做義工照顧病人。逐家講甲當熱的時，老師提幾若跤紙箱仔出來，講：「行！咱來去外口鼓勵民眾共發票捐予基金會，若是著獎金就會當增加個的經費。」就按呢阮四、五個人一組，紙箱仔提咧趕緊綴老師行出去。

阮這組先行到一間麪店的門跤口，看人客出出入入，生理敢若袂稜，阮拍算倚佇門跤口試看覓。過一睏仔，就有人客對店內行出來，阮煞揀來揀去，毋敢開喙共人姑情，倚半晡嘛無人插阮。想想咧，搨一跤箱仔懸懸倚蹠遮嘛毋是辦法，抑無，我來大聲喝拜託好矣！

「拜託！拜託！請逐家共發票捐出來，做好代，同齊來。」同學看我喝甲遮大聲隨綴咧同齊喝。一位阿桑聽著

就行倚來面前前，那對橐袋仔擣幾若張皺襞襞的發票出來那講：「因仔兄、因仔姊，恁誠乖喔！來，我遮有一寡仔發票攏予恁。」繼手共發票擲入去紙箱仔內底，阮歡喜甲一直頤頭說多謝。

第二站行到便利商店的門跤口，佇鬱熱的六月倚蹠外口喝甲喙焦喉渴、流汗流滂，其實不止仔忝頭，毋過看著過路人共發票捐出來的時，阮的辛苦早就袂記得矣！

活動結束，想袂到阮班佇短短的時間就收著六十外張發票。老師呵咾逐家：「勸人做好代，較贏食早齋！咱這班的學生是上有愛心的。」原來做好代是遮爾有成就感的代誌！這個活動實在誠有意義，我毋但學著智識嘛會曉做功德，以後我會繼續做好代，共愛心滌去全世界。



05 骨力做，才趁會著好運

曾裕樞¹

阮阿公佇阮躡的龍泉路這箍圍仔真出名，因為伊對需要門相共的人攏會用愛心去共個幫贊，對地方的大細項公共事務嘛攏會熱心參與。雖然伊毋是地方的頭人，毋過伊是地方出名的人；雖然伊毋是大好額人，毋過伊是願意為地方奉獻的人。

阿公講伊細漢厝裡散赤，三頓食袂飽，厝裡的兄弟姊妹逐个攏嘛黃酸黃酸，飼袂大漢，父母嘛無錢通好予囡仔讀較懸咧，小學若讀有畢業就愛家己出去拍拚趁錢。

阿公生做細粒子，因為捌出過車禍，造成伊的倒手四肢指頭仔袂拗彎，大頭姆永遠曲曲，手攏咧比四，算講倒手破相去矣。

阿公少年的時共人借四萬箍，佇臺北買一个擔仔位開始做事業。半暝仔三、四點伊就愛起床，騎機車去臺北買菜、攢料，炒一、二十項好食閤營養的菜，予人食早頓配糜抑是配飯。早頓做煞就愛閤攢中畫頓；中畫頓做煞，暗時閤繼咧排夜市仔。這個路邊擔仔位，干焦三、四坪爾爾，是佇一檯榕仔跤，若佇熱人，就燶甲大粒汗、細粒汗；若佇寒人，手就予水滲甲大空細裂。若想著阿公辛苦拍拚的形影，我的心肝就會足毋甘。聽阿公講伊捌佇風颱天，規

个布篷予風掀掀去，連 gá-suh 桶嘛吹甲翩翩輾，阿公講伊就是驚遐的老客戶無通食，毋才會連風颱天嘛無歇睏。

人講：「人愛生緣，毋免生婿。」阿公生做足好笑神，對人足親切，誠勢招呼人客。雖然阿公的個性真土直閣大嚨喉空，毋過若拄著小姐來食飯，伊嘛會用較溫柔的聲音講話。阮阿公毋但善良閣有愛心，對一寡艱苦人抑是有路無厝的，伊攏真慷慨予個食免錢的。

阿公雖然是做路邊擔仔的生理，毋過骨力拍拚，做三年就買車，啊若買厝免貸款，是捧現金去買的喔！阿公雖然毋是啥物大人物，毋過伊真正是我這世人做人做事的模範，伊對人親切恰做代誌認真拍拚的精神，深深印佇我的頭殼內。伊予我難忘的形影，若像一直咧共我講：「骨力做，才趁會著好運喔！」

¹曾裕樞(lui)

